



## Smjernice za trogodišnje planiranje rada Unsko-sanskog kantona za period 2023.– 2025. godine

### 1. Svrha Smjernica

Izrada Smjernica za trogodišnje planiranje rada Unsko-sanskog kantona za period 2023.-2025. godine (u daljem tekstu: Smjernice) obaveza je u skladu sa Uredbom o trogodišnjem i godišnjem planiranju rada, monitoringu i izvještavanju u Federaciji Bosne i Hercegovine (u daljem tekstu: FBiH) („Službene novine Federacije BiH“, broj: 74/19 i 2/21) (u daljem tekstu: Uredba). Smjernice predstavljaju osnovu za planiranje rada kantonalnih organa uprave i kantonalnih upravnih organizacija u naredne tri godine, kako bi se na adekvatan način uključili razvojni prioriteti koji su definisani Strategijom razvoja Unsko-sanskog kantona za period 2021.-2027. godina, Okvirom za implementaciju ciljeva održivog razvoja u BiH, ekspozeom kantonalnog premijera i drugim relevantnim dokumentima. Smjernice imaju za cilj da potenciraju ključne aktivnosti koje je neophodno poduzeti u narednom planskom ciklusu, a koje imaju sinergijski efekat za više oblasti društveno-ekonomskog života kantona.

Uredbom su propisani minimalni elementi Smjernica, a iste se izrađuju svake godine za period od tri godine (1+2) i pripremaju se u skladu sa strateškim dokumentima relevantnim za Unsko-sanski kanton. Pored toga što predstavljaju usmjerenje za budući rad organa uprave, Smjernice služe i ostalim zainteresovanim stranama (vaninstitucionalnim akterima) kao vodilja za planiranje i implementaciju konkretnih projekata i aktivnosti u narednom trogodišnjem periodu.

### 2. Kratak osvrt na opšti razvojni kontekst uključujući izazove i rizike

Unsko-sanski kanton je prema indeksu razvijenosti<sup>1</sup> u 2020. godini rangiran kao osmi od deset kantona u Federaciji Bosne i Hercegovine. Prema rezultatima popisa stanovništva iz 2013. godine, Unsko-sanski kanton je sa 273.261 stanovnika i 66,25 stanovnika/km<sup>2</sup> četvrti po broju stanovnika i sedmi po gustoći naseljenosti među kantonima u **Federaciji Bosne i Hercegovine**. Prema procjenama, prisutan je trend blagog pada ukupnog broja stanovnika Unsko-sanskog kantona u godinama nakon popisa stanovništva na 266.535 u 2020. godini. Iz ugla demografskih kretanja, zabrinjavajući je stalan pad broja stanovnika kao i stopa prirodnog priraštaja koja je od 2015. godine negativna. Starosna i obrazovna struktura još uvijek nisu nepovoljne, a može se također uočiti da postoji značajan broj razloga za migracije stanovništva koje se prvenstveno odvijaju prema evropskim zemljama.

Na kraju 2020. godine, **vrijednost izvoza** u Unsko-sanskom kantonu je iznosila 367 miliona KM, a prosječna mjesečna neto plata u ugostiteljstvu i hotelijerstvu kao jednoj od strateških

<sup>1</sup>Federalni zavod za programiranje razvoja (2020)

grana razvoja kantona je bila 507 KM. U toku 2019. godine Unsko-sanski kanton je imao 64.416 turističkih dolazaka i 101.210 noćenja. Međutim, u 2020. godini, zbog pandemije COVID-19, zabilježen je pad na samo 22.702 turističkih dolazaka i 38.525 noćenja. U 2021. godine došlo je do povećanja i u prvih deset mjeseci zabilježeno je 39.147 turističkih dolazaka i 66.655 noćenja. Rast broja noćenja od 2015. godine, posebno u hotelima, ukazuje na značajan porast interesovanja i potražnje za turističkom ponudom Unsko-sanskog kantona, što je, imajući u vidu prirodna bogatstva, svakako oblast na čijem razvoju i promociji treba i dalje raditi, posebno s fokusom na kvalitet ponude. Unsko-sanski kanton raspolaže značajnim prirodnim bogatstvima gdje se ističu šume, nalazišta ruda, zemljište pogodno za razvoj poljoprivrede kao i bogatstvo voda. Prirodni resursi se mogu koristiti u većoj mjeri pošto trenutni stepen korištenja ovih resursa, na primjer poljoprivrednih površina, nije na zadovoljavajućem nivou. Moguće je povezivanje poljoprivredne proizvodnje sa prerađivačkom industrijom, ali i sa turističkom ponudom. Povećanje stepena korištenja prirodnih resursa razvojem i modernizacijom kapaciteta u poljoprivredi i povezivanjem poljoprivrednih proizvođača sa tržištem će biti jedan od prioriteta razvoja Unsko-sanskog kantona u narednim godinama.

Kada govorimo o **obrazovanju** Kanton je u 2020. godini imao 68 učenika na 1000 stanovnika u osnovnom obrazovanju, dok je taj broj za srednje obrazovanje iznosio 28. S obzirom na vidljiv trend opadanja broja učenika od 2015. godine, posebno u područnim školama, nužne su mjere racionalizacije broja područnih škola s jedne strane te proširenje kapaciteta postojećih gradskih/općinskih objekata, ukoliko se to pokaže adekvatnim nakon detaljne analize procesa racionalizacije. Već dugi niz godina postoji neusklađenost obrazovnog sistema sa potrebama tržišta rada. Sumirajući pružanje usluga u **javnom zdravstvu** Unsko-sanskog kantona možemo uočiti da je broj građana na jednog ljekara u 2020. godini bio 749, a stopa mortaliteta na 1.000 stanovnika je iznosila 10. Broj ljekara od 1,34 na 1000 stanovnika manji je od evropskog prosjeka od 3,2 ljekara na 1000 stanovnika. U prosjeku posmatranog perioda, Unsko-sanski kanton je raspolagao sa 688 bolničke postelje, odnosno 2,6 na 1000 stanovnika, dok je evropski standard šest postelja na 1.000 stanovnika. S aspekta javne sigurnosti u 2020. i 2021. godini, **sigurnosno stanje** Unsko-sanskog kantona karakteriše smanjenje broja evidentiranih krivičnih djela, a povećanje broja prekršaja iz oblasti javnog reda i mira i povećanje broja saobraćajnih nezgoda. Važno je istaći da je u toku 2021. godine broj krivičnih djela na 1000 stanovnika u Kantonu iznosio 4,71, a broj prekršaja na 1000 stanovnika je bio 14,8. **Migrantska kriza** na području Unsko-sanskog kantona i dalje traje. Dinamika pristizanja migrantske populacije na područje Unsko-sanskog kantona još uvijek je prisutna, u 2021. godini u nešto manjem obimu u odnosu na raniji period. Ministarstvo unutrašnjih poslova putem Uprave policije u kontinuitetu od same pojave migrantske krize pa do sada suočeno je sa ogromnim izazovom očuvanja sigurnosne situacije i održavanja iste, a što uveliko utječe na ostale aktivnosti i rad policijskih službenika na području Unsko-sanskog kantona. U toku 2021. godine je na području Unsko-sanskog kantona bilo registrovano 19.913 migranata, dok je na kraju 2020. godine taj broj iznosio 31.938.

Kada govorimo o **zagađenju zraka** bitno je napomenuti da je Unsko-sanski kanton u saradnji sa Federalnim hidrometeorološkim zavodom Bosne i Hercegovine u 2021. godini obezbijedio

donaciju automatske stanice za mjerenje kvalitete zraka na području Unsko-sanskog kantona. Nakon više od trideset godina uz vremensku prognozu iz Bihaća dostupni su i podaci o kakvoći zraka. Ovaj izuzetno vrijedan uređaj donacija je Švedske agencije za međunarodni razvoj i saradnju (SIDA) u okviru trogodišnjeg projekta "IMPAQ", a isti je implementirala Švedska agencija za zaštitu okoliša (SEPA). Mjerna stanica bilježi koncentraciju lebdećih čestica PM10 i PM2.5, sumpordioksida, ozona, ugljičnog monoksida i azotnih oksida, što predstavlja standardni set praćenih polutanata koji imaju najveći negativni utjecaj na zdravlje ljudi. Puštanjem u rad mjerne stanice Unsko-sanski kanton je stavljen na federalnu mapu monitoringa kvalitete zraka, ali i na mapu Evropske okolišne agencije. Najveće prijetnje po kvalitet zraka na području Unsko-sanskog kantona predstavljaju ispušni plinovi vozila na motorni pogon te dim od loženja krutih i tekućih goriva za potrebe grijanja (drvo, ugalj, nafta). U pogledu **upravljanja otpadom**, prema podacima iz Plana upravljanja otpadom Unsko-sanskog kantona 2014.-2019. godina dnevno stvaranje otpada po osobi iznosi 0,814 kg/stan./dan, a prema Federalnom planu upravljanja otpadom te količine su 0,96 kg/stan./dan. Treba uzeti u obzir da su ovi podaci relativno zastarjeli i da se produkcija otpada povećava shodno razvoju savremenog društva, kao i pokrivenosti redovnih usluga prikupljanja otpada u Unsko-sanskom kantonu od strane komunalnih preduzeća. Konačno, s aspekta **energetske efikasnosti** potrebno je naglasiti da ista podrazumijeva efikasnu upotrebu energije u svim sektorima krajnje potrošnje energije: industriji, saobraćaju, uslužnim djelatnostima, poljoprivredi i u domaćinstvima. Osnovni prioriteti vezani su za poboljšanje tehnoloških i operativnih performansi energetske izvora/objekata kroz modernizaciju energetske sistema i revitalizaciju energetske izvora/objekata, te primjenu novih energetske efikasnijih i ekološki prihvatljivih tehnologija provedenjem mjera energetske efikasnosti. Mjere energetske efikasnosti podrazumijevaju radnje i aktivnosti kojima se na provjerljiv, mjerljiv i procjenljiv način postiže poboljšanje energetske efikasnosti. To podrazumijeva toplinsku izolaciju krova ili stropa prema negrijanom prostoru, zamjenu prozora, staklene stijene i vanjskih vrata te toplinska izolacija zgrade.

Imajući u vidu negativne zdravstvene i ekonomske posljedice izazvane **pandemijom COVID-19**, važno je istaći da je u 2021 godini stanje nešto bolje nego u 2020. godini. Dok je u 2020. godini došlo do smanjenja broja zaposlenih (36.311 radnika) u 2021. godine se taj broj povećao na 37.691 radnika. I u sektoru turizma koji je bio snažno pogođen došlo je do povećanja priliva turista i broja noćenja u 2021. godini u odnosu na 2020. godinu. Također, ključno je naglasiti da je još uvijek nemoguće sagledati posljedice koje će pandemija COVID-19 ostaviti, kako na privredni tako i na društveni razvoj.

### **3. Strateški pravci razvoja**

Strategija razvoja Unsko-sanskog kantona za period 2021.-2027. godina usvojena je na 17. redovnoj sjednici Skupštine Unsko-sanskog kantona dana 19.05.2021. godine („Službeni glasnik broj: 35/21). Vlada Unsko-sanskog kantona je usvajanjem Strategije razvoja Unsko-sanskog kantona definisala i uskladila razvojne pravce i prioritete Unsko-sanskog kantona sa ključnim nacionalnim i međunarodnim razvojnim dokumentima. Kroz privredni razvoj zasnovan na znanju i održivom korištenju prirodnih resursa, razvoj inkluzivnog i

prosperitetnog društvenog sektora te održivu zaštitu okoliša i prirode kroz promociju i podsticanje održivog korištenja resursa, Unsko-sanskog kantona teži ka ostvarenju vizije razvoja sa kojom će postati Euro regija – smaragd Bosne i Hercegovine, područje ugodnog života temeljenog na ravnomjernom održivom razvoju. Iz navedenih strateških pravaca razvoja kao i vizije razvoja Unsko-sanskog kantona definisana su tri strateška cilja do 2027. godine:

1. Izgrađeni privredni kapaciteti uz održivo korištenje prirodnih resursa;
2. Unaprijeđen razvoj inkluzivnog i prosperitetnog društvenog sektora;
3. Održivo upravljanje okolišem, prirodnim i infrastrukturnim resursima.

Stepen realizacije definisanih strateških ciljeva će se mjeriti kroz set indikatora uticaja definisanih Strategijom razvoja Unsko-sanskog kantona do 2027. godine koji obuhvataju ekonomski razvoj, društveni razvoj te zaštitu životne sredine. Stepen ekonomskog razvoja Unsko-sanskog kantona u periodu od 2021.-2027. godine će se mjeriti kroz sljedeće indikatore:

Indikatori uticaja	Polazna vrijednost (2021)	Ciljna vrijednost (2027)
Vrijednost izvoza	386 mil KM	500 mil KM
Prosječna mjesečna neto plata u prerađivačkoj industriji	705 KM	1000 KM
Prosječna mjesečna neto plata u ugostiteljstvu i hotelijerstvu	521 KM	800 KM

Stepen realizacije razvoja inkluzivnog i prosperitetnog društvenog sektora mjerit će se kroz nekoliko ključnih indikatora kao što su:

Indikatori uticaja	Polazna vrijednost (2021)	Ciljna vrijednost (2027)
Stepen migracija stanovništva, %	-27	0
Grupa razvijenosti kantona na nivou FBiH	III	II

Konačno, za praćenje realizacije održivog upravljanja okolišem, prirodnim i infrastrukturnim resursima, definisani su sljedeći indikatori:

Indikatori uticaja	Polazna vrijednost (2021)	Ciljna vrijednost (2027)
Udio komunalnog otpada koji se odlaze na sanitarne deponije, %	0	60
% građana spojen na kanalizacijsku mrežu	54%	70%
Broj važećih prostornih planova JLS	2 (Bužim i Bosanska Krupa)	8

Definirani strateški ciljevi Unsko-sanskog kantona su direktno usklađeni i proizilaze iz nekoliko ključnih strateških dokumenata sa viših nivoa vlasti u Bosni i Hercegovini kao što su: Strategija razvoja FBiH 2021.-2027. godine, Prioriteti za razvoj visokog obrazovanja u BiH za period 2016.-2026., Strategija protivminskog djelovanja BiH 2018.-2025., Strateški plan ruralnog razvoja BiH 2018.-2021., Okvirna strategija prometa BiH 2015.-2030., Okvirna energetska strategija BiH do 2035. godine, Strategija prilagođavanja na klimatske promjene i niskoemisionog razvoja BiH za period 2020.-2030. (nacrt), Strateške smjernice za harmonizaciju podrške razvoju malih i srednjih preduzeća i preduzetništva u BiH za period 2021.-2027. (radna verzija), Strategija za unapređenje prava i položaja osoba sa invaliditetom u FBiH 2016.-2021., Strategija borbe protiv dijabetesa u FBiH 2014.-2024., Strategija upravljanja vodama FBiH 2010.-2022., Transportna strategija FBiH 2016.-2030., Strateški pravci razvoja visokog obrazovanja u FBiH 2012.-2022., Plan upravljanja vodama za vodno područje rijeke Save u FBiH 2016.-2021., Okvir za realizaciju Ciljeva održivog razvoja u BiH do 2030. godine.

Kako bi se osigurao visok stepen realizacije zacrtanih strateških ciljeva Unsko-sanskog kantona do 2027. godine, Vlada Unsko-sanskog kantona je usvojila i set prioriteta do 2027. godine koji pokrivaju sve oblasti od strateškog značaja za razvoj Unsko-sanskog kantona.

Kako bi izgradili privredne kapacitete uz održivo korištenje prirodnih resursa, Vlada Unsko-sanskog kantona će do 2027. godine raditi na realizaciji sljedećih prioriteta:

- Uspostavljanje sistema za održivo korištenje i odgovorno upravljanje prirodnim resursima;
- Unapređenje poslovnog okruženja;
- Unapređenje konkurentnosti prerađivačke industrije;
- Promocija održivog turizma i efektiviranje turističkih potencijala.

S ciljem unapređenja razvoja inkluzivnog i prosperitetnog društvenog sektora, Vlada Unsko-sanskog kantona će se do 2027. godine fokusirati na realizaciju sljedećih prioriteta:

- Usklađivanje sistema obrazovanja u skladu sa modernim EU praksama;
- Jačanje socijalne inkluzije i pristupa zasnovanih na potrebama korisnika;
- Unapređenje sistema integrisanih zdravstvenih usluga;
- Povećanje stepena javne sigurnosti i održivo upravljanje rizicima od prirodnih i drugih nesreća.

Konačno, kako bi realizovali održivo upravljanje okolišem, prirodnim i infrastrukturnim resursima, Vlada Unsko-sanskog kantona će do 2027. godine usmjeriti sve raspoložive resurse na sljedeće prioritete:

- Podrška primjeni integralnog sistema upravljanja okolišem i prostornom upravljanju prirodnim resursima;
- Razvoj komunalne i javne infrastrukture na principima održivog okolišnog razvoja.

#### 4. Strateški projekti

Strategijom razvoja Unsko-sanskog kantona za period od 2021.-2027. godine, Vlada Unsko-sanskog kantona se opredijelila za nekoliko strateških projekata čija realizacija bi trebala da osigura najšire pozitivne društveno-ekonomske efekte koji će doprinijeti razvoju ekonomskog i društvenog razvoja kao i zaštite životne sredine:

1. Usklađivanje zemljišnih knjiga sa katastarskim stanjem i stanjem na terenu;
2. Uspostavljanje poslovnog inkubatora;
3. Rekonstrukcija i povećanje smještajnih kapaciteta kao i boljeg korištenja prirodnih resursa Lječilišta Gata;
4. Izgradnja Administrativnog centra Unsko-sanskog kantona;
5. Uspostavljanje robnih rezervi Unsko-sanskog kantona.

Kako bi se osigurala realizacija strateških projekata, ali i prioriteta definisanih Strategijom razvoja Unsko-sanskog kantona 2021.-2027. godine kao i drugim strateškim dokumentima na višim nivoima vlasti u BiH, Vlada Unsko-sanskog kantona će se u periodu od 2023. - 2025. primarno fokusirati na realizaciju slijedećih mjera i aktivnosti koje pokrivaju ekonomski i društveni sektor, infrastrukturu i zaštitu okoliša:

- Intenzivirati primarnu poljoprivrednu proizvodnju u svrhu dostatnosti poljoprivrednih proizvoda za stanovništvo Unsko-sanskog kantona, koji ima za cilj osigurati djelomičnu neovisnost Unsko-sanskog kantona o uvozu hrane te potaknuti bolju iskorištenost poljoprivrednih kapaciteta, proizvodnju kao i izgradnju prehrambenih kapaciteta. Također je bitno zaokružiti cijeli proces od proizvodnje do prerade te marketinga i korištenja gotovih proizvoda.
- Uspostavljanjem robnih rezervi Unsko-sanskog kantona s fokusom na poljoprivredne proizvode osigurale bi se minimalne potrebe stanovništva i privrede u uslovima neposredne opasnosti, prirodnih nepogoda i drugih vanrednih prilika te bi se iste koristile za intervencije na tržištu u uslovima poremećaja u snabdijevanju stanovništva i privrede.
- S ciljem dodatnog povezivanja gradova i općina unutar kantona, raditi na razvoju i uvezivanju međuopštinskog turizma, poslovnih zona i puteva. Kroz bolju saobraćajnu povezanost kantona doprinijeti će se boljem uvezivanju turističkih sadržaja na čitavom kantonu, što bi rezultiralo povećanim brojem turista kao i dužem ostanku istih na teritoriji Unsko-sanskog kantona. Istovremeno boljom opremljenošću svih poslovnih zona stvorit će se uslovi za strane investicije kao i povećanje broja radnih mjesta.
- Dodatnim ispitivanjem termalnih voda u lječilištu "Gata", te proširenjem kapaciteta lječilišta "Gata" Vlada Unsko-sanskog kantona planira stvoriti uvjete za dodatni razvoj banjanskog turizma, ali i zdravstva u cjelini te povećati smještajne kapacitete za 20% u odnosu na trenutno stanje.
- Infrastrukturnim uređenjem i rekonstrukcijom postojećih objekata Kantonalne bolnice „Dr. Irfan Ljubijankić“ te kadrovskim jačanjem i tehničkim opremanjem stvorili bi se uslovi za osnivanje univerzitetsko-kliničke bolnice.

- Iskorištavanjem postojećih kapaciteta domova zdravlja posebno Doma zdravlja Bosanski Petrovac stvorili bi se uslovi za smještaj, njegu i skrb za ranjive kategorije, odnosno djecu i lica s poteškoćama u razvoju.
- Jačanjem kadrovskih i tehničkih kapaciteta policije, te izgradnjom novih i rekonstrukcijom postojećih objekata s ciljem unapređenja kapaciteta za nošenje sa migrantskom krizom i sigurnosti građana u Unsko-sanskom kantonu, planira se smanjiti broj krivičnih djela i prekršaja i time povećati sigurnost građana.
- Provođenje prostornog plana Unsko-sanskog kantona. Prostorni plan je razvojni planski dokument koji određuje dugoročne ciljeve i mjere prostornog razvoja u skladu s planiranim ukupnim privrednim, društvenim i historijskim razvojem prostora koji se tretira. Donošenjem Prostornog plana Unsko-sanskog kantona za period od 20 godina kao temeljnog dokumenta prostornog uređenja, obezbijedili bi se kvalitetniji uvjeti ekonomskog i socijalnog razvoja u uređenoj prirodnoj i životnoj okolini. Ovaj dokument usmjerio bi razvoj djelatnosti i namjenu površina te bi utvrdio uvjete za održivi i uravnoteženi razvoj na području cijelog Kantona.
- Povećanjem prostornih kapaciteta i jačanjem kadrovskih kapaciteta privatnih i javnih predškolskih ustanova planira se obuhvatiti što veći broj djece u predškolskim ustanovama.
- Kurikularnom reformom u predškolskom, osnovnom i srednjem obrazovanju planira se razvijanje kurikuluma po nivoima obrazovanja i predmetnim područjima te usklađivanje obrazovnog sistema s potrebama tržišta rada što će doprinijeti smanjenju broja nezaposlenih i čime će se ublažiti stepen migracije stanovništva.
- Digitalizacija u obrazovanju na području Unsko-sanskog kantona podrazumijeva digitalizaciju administracije, ali i međusobne komunikacije učenika, nastavnika i školskih upravljačkih struktura kao i samih škola s Ministarstvom obrazovanja, nauke, kulture i sporta.
- Usvajanjem i implementacijom novog Zakona o visokom obrazovanju koji bi bio usklađen s Okvirnim zakonom o visokom obrazovanju u Bosni i Hercegovini poboljšali bi se uslovi rada JU Univerzitet u Bihaću. Univerzitet u Bihaću je javna ustanova koja organizuje i izvodi univerzitetske studije, naučni i visokostručni rad, razvija naučno, tehnološko i umjetničko stvaralaštvo.
- Izgradnja plinovoda na području Unsko-sanskog kantona. Projekat gasifikacije Unsko-sanskog kantona planiran je Strateškim planom i programom razvoja energetskog sektora FBiH iz 2009. godine i obilježen je kao srednjoročni projekat od značaja za Federaciju Bosne i Hercegovine s planiranim ulazom prirodnog gasa iz pravca Republike Hrvatske. U prvoj fazi je predviđena gasifikacija gradova u blizini granice, dok bi se u drugoj fazi projekta gasifikacija proširila i na ostale gradove Unsko-sanskog kantona. Realizacijom ovog projekta došlo bi do povećanja tržišta prirodnog gasa u BiH, ali i povećanja sigurnosti snabdijevanja, obzirom da bi se obezbijedio novi ulaz za cjelokupni sistem.
- Nastavak izgradnje aerodroma u Unsko-sanskom kantonu, koji je jedan od strateških prioriteta za Unsko – sanski kanton jer bi se s izgradnjom navedenog aerodroma postigla bolja i brža povezanost s glavnim gradom, zatim bi se omogućila bolja povezanost dijaspore s Unsko-sanskim kantomom i na kraju uveliko bi se doprinijelo razvijanju Unsko-sanskog kantona kao turističke destinacije.

- Jačanjem obnovljivih izvora energije kroz izgradnju vjetroparkova i solarnih elektrana Vlada Unsko-sanskog kantona planira povećati udio korištenja obnovljivih izvora energije te smanjiti potrošnju energije u javnim objektima Unsko-sanskog kantona.
- Razvojem cestovnog prometa na pravcu Bihać – Karlovac - Novo Mesto, izgradnjom brze ceste Bihać – Cazin – Velika Kladuša, zaobilaznice Bihać – Cazin, povezivanjem grada Bihaća sa općinom Bosanska Krupa, općine Sanski Most sa gradom Prijedor, te povećanjem broja graničnih prelaza Vlada Unsko-sanskog kantona planira jačati transportne i saobraćajne kapacitete te povećati vrijednost izvoza, ukupan prihod od turizma i broj novih investicija.
- Jačanjem saradnje sa dijasporom Vlada Unsko-sanskog kantona planira stvoriti priliku za umrežavanje, trgovanje, investiranje, istraživanje i transferiranje znanja, vještina, inovacija, tehnologija, institucija i vrijednosti i time povećati udio novih investicija i broj novoosnovanih privrednih subjekata.

## 5. Indikativni finansijski okvir

Realizacija planiranih prioriteta, mjera i strateških projekata za period od 2023.-2025. godine finansirati će se kombinacijom budžetskih sredstava Vlade Unsko-sanskog kantona, budžetskih sredstava JLS s područja Unsko-sanskog kantona kao i vanbudžetskim sredstvima. Vlada Unsko-sanskog kantona je Akcionim planom za realizaciju mjera i strateških projekata iz Strategije razvoja Unsko-sanskog kantona za period 2023.-2025. godine, predvidjela 302.933.699 KM od čega su budžetska sredstva 125.784.930 KM i 177.148.769 KM ostali vanjski izvori. Pored 106.259.278 KM planiranih u 2023. godini, za 2024. godinu je planirano 101.534.646 KM, a za 2025. godinu 95.139.775 KM. Za mjere i projekte planirane za realizaciju i doprinos ostvarenju izgradnje i razvoja privrednih kapaciteta u Unsko-sanskog kantonu za period od 2023.-2025. godine, planirano je oko 62.812.159 KM. Za razvoj inkluzivnog i prosperitetnog društvenog sektora, Vlada Unsko-sanskog kantona u periodu od 2023.-2025. godine, planira osigurati 107.793.061 KM budžetskih i vanbudžetskih sredstava. Konačno, za održivo upravljanje okolišem, prirodnim i infrastrukturnim resursima za naredne tri godine je planirano ukupno 132.328.479 KM.

### Aneks 1: Akcioni plan za period 2023.-2025. godine

Broj: 03-11-1748-1/22  
Bihać, 21.02.2022.

PREMIJER KANTONA  
mr. sci. Mustafa Ružnić